



Vreemdelinge haat teenoor liefde vir ons naaste – parameters vir 'n gelowige

Om *Blitspos* te ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan taal@nhk.co.za

Die plasing van teksadvertensies is gratis vir gemeentes. Advertensies met grafika beloop R350 per uitgawe. Klik asseblief [hier](#) vir meer inligting en voorwaardes.

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Xenofobie is, aldus die Handwoordeboek van die Afrikaanse Taal, die afkeer van alles wat vreemd is of anders gestel, vreemdelinge haat. Daarteenoor staan die liefdesgebod wat lui: 'Jy moet die Here jou God liefhê met jou hele hart en met jou hele siel' en met jou hele verstand. Dit is die grootste en die eerste gebod. En die tweede, wat hiermee gelyk staan, is: 'Jy moet jou naaste liefhê soos jouself' (Matt 22: 37-39). Om dit te kompliseer, gebruik Jesus boonop 'n Samaritaan as voorbeeld in sy gelykenis. Hoe versoen ons hierdie uiteenlopende gedagtes met mekaar? Is haat onder sekere omstandighede aanvaarbaar?

Die afgelope paar maande het verskeie xenofobiese voorvalle ons koerantopskrifte ontsier. Ons lees trouens deesdae byna daagliks van aanvalle op, of opstande teen migrante. Dit maak dikwels nie eens saak of die slagoffers van xenofobiese aanvalle wettig of onwettig in die land is nie. Indien jy 'n migrant is, loop jy by voorbaat die risiko om gehaat en moontlik aangeval te word. Kyk maar na koerantopskrifte soos: *Buitelanders: Slegs 2 van 457 wat in Durban skuiling soek onwettig in die land* (Netwerk24, 23 Mei 2026), *'Hulle vat ons werk': Groepe betoog aan Oos-Rand teen migrante* (Netwerk24, 8 Junie 2026), *Twee dood in vermoedelik xenofobiese geweld* (Netwerk24, 31 Mei 2026), *Xenofobie in Suid-Kaap: Buitelanders hervestig, nog polisie ontplooi* (Netwerk24, 2 Junie 2026) en *Xenofobie: Geweld vererger in W-Kaap; 2 aangekeer weens moord* (Netwerk24, 9 Junie 2026). Hierdie opskrifte verteenwoordig maar net die oortjies van die seekoei.

Daar is groot gewag gemaak van optogte wat beplan is vir 30 Junie wat daarop gemik was om die misnoeë oor die aantal migrante in Suid-Afrika aan te dui. Die organiseerders het belowe dat die optogte vreedsaam sou verloop, maar gebeurde in die verlede het ons geleer dat die teenoorgestelde dikwels gebeur. Ons het almal op hete kole gesit en die nuus dopgehou. Selfs Suid-Afrikaners het lievers tuisgebly om moontlike gevaar te vermy. Die optogte het genadiglik grootliks sonder geweld verloop.

In reaksie hierop het verskeie lande hul burgers begin repatrieer. Nigerië en Ghana was eerste aan die beurt. Meer as 7 900 Malawiërs het in haglike omstandighede in repatriasiesentrums in Durban en Pietermaritzburg gewag om na Malawi terug te keer. Hierdie is nie 'n probleem wat slegs beperk is tot sekere provinsies nie, dit is 'n algemene probleem.

Die Suid-Afrikaanse Raad van Kerke (SARK) het op 9 Junie 'n pastorale skrywe aan sy lidkerke en gelowiges in Suid-Afrika gerig oor die gebeure in die land. Hierin vra aartsbiskop Sitembele Sipuka, president van die SARK, dat Christene hulself moet beywer vir liefde teenoor hul naaste, selfs al is dit net om 'n kombens te gee aan iemand wat dit benodig. Die SARK vra ook dat die regering hulself daaraan moet verbind om 'n oplossing vir dié probleem te vind. Die Afrika Gemeenskap van Gereformeerde Kerke veroordeel xenofobie in 'n soortgelyke skrywe, gedateer 18 Junie 2026.

Christenskap vra dat ons in alle omstandighede, selfs ook wanneer ons met mense van buite ons grense en hul nood en behoeftes gekonfronteer word, steeds getrou sal bly aan die liefdesgebod. Kom ons bid eerder saam vir 'n oplossing vir hierdie vreemdelinge haat wat tans in Suid-Afrika woed.

Sanet du Plessis
(Taalversorger / Produksiebestuurder)

Lief en leed

- **Ds Marlize Gasson** (Benoryn) se man, **mnr Gordon Gasson**, is aangewys as die nuwe **skoolhoof van Hoërskool Erasmus**. Baie geluk!
- **Mnr Kobus Viljoen** (voormalige administrateur van die NHKA) is tans gehospitaliseer met **longontsteking**. Sy eggenote, **mev Gonda Viljoen**, herstel mooi na haar onlangse **heupvervanging**. Ons wens hulle 'n spoedige herstel toe.
- **Die volgende predikante verjaar tot 10 Julie. Die Kerk wens u 'n geseënde lewensjaar toe.**
 - Woensdag 1 Julie: Ds MM (Marlize) Gasson (Benoryn)
 - Donderdag 2 Julie: Dr MJ (Martin) Jansen van Rensburg (Delmas)
 - Vrydag 3 Julie: Ds PW (Waldo) Pretorius (Ventersdorp)
 - Woensdag 8 Julie: Ds GJ (Geo) Smit (Potchefstroom-Suid)
 - Vrydag 10 Julie: Dr DJC (Daan) van Wyk (Van Der Hoff)

Gemeentes en bediening



Prop Antoinette van Zyl

- **Prop Antoinette van Zyl** (beroepafwagtend) is Sondag, 28 Junie, in Gemeente Volksrust deur ds Leon Geel **gelegitimeer**. Dr Colin Hertzog en ds Paul Buitendag het ook die geleentheid bygewoon.
- **Ds GJ (Geo) Smit** (Potchefstroom-Suid) emeriteer op 31 Julie 2026. Hy het 'n deeltydse beroep na Potchefstroom-Suid ontvang. Hy het die **beroep aanvaar** en word op 6 September bevestig.
- **Ds JS (Fanie) Naude** (emeritus/Greylingstad) is twee maal per maand **beskikbaar vir preekbeurte**.
- Enige saak wat volgens die Kerkorde onder die aandag van die **Moderamen** gebring moet word, moet mev Karen Breedt (karen@nhk.co.za) asseblief **teen 13 Julie** bereik vir die vergadering van **24 Julie**. **Geen laat sake** sal in die agenda opgeneem word nie.



Ds Geo Smit

Werkgeleenthede

- **Werkruimte vir orrelis: Gemeente Potchefstroom**
Die gemeente sien musiek as 'n belangrike en integrale deel van die erediens (<https://nhkpotch.my.canva.site/>). Eredienste vind om 09:30 op Sondag plaas, asook tydens spesiale geleenthede soos Kersfees, Paasfees, ensovoorts. Die meeste van ons sang is uit die *Liedboek van die kerk* en die VONKK-bundel. Die orrel is gemaak deur Bevington & Sons met pragtige fronttype en word gereeld onderhou en gestem.

Taakoms Krywing:

- Begeleiding van sang tydens eredienste.
- Voorbereiding en uitvoering van gepaste voor- en naspele tydens eredienste, asook ander gepaste liturgiese musiek.
- Samewerking met ander musikante, byvoorbeeld tydens spesiale eredienste.
- Beplanning en uitvoering van relevante fasette van sangdienste (byvoorbeeld Kerssangdiens en Paassangdiens).
- Klavierbegeleiding van sang by katkisasiegeleenthede.
- Reël van plaasvervangers in geval van verlof.

Navrae: Dr Marina Kok-Pretorius, 076 288 2843, marinakok95@gmail.com

Aansoek: Stuur 'n bondige CV met relevante opleiding en ondervinding aan marinakok95@gmail.com.

Sluitingsdatum: 1 Augustus 2026. Die gemeente behou die reg om die pos nie te vul nie.



Ds Fanie Naude

Kerklke en ander publikasies



'n Woord vir elke dag

Hierdie bundel bring al die Gedagtes vir die Dag saam – daaglikse oordenkings wat ontstaan het uit die NHKA *Bybelse Dagboek*.

'n Metgesel op jou geestelike reis.

R160
(versending uitgesluit)

DEPERKTE VOORRAAD

'N WOORD VIR ELKE DAG

Bestel by boekwinkel@nhk.co.za




BOEKWINKEL-PROMOSIE

R200 VIR ALBE!

SKRIFBESKOUIING **HERVORMDE KERKREG**

Bestel van mev Sarie Roux by boekwinkel@nhk.co.za



Kom kyk saam

- Kom kyk saam na ons weeklikse Blitsflits. Hierdie episode is aangebied deur Lane Truscott. Klik [hier](#) vir verlede week se weergawe. Nuwe weergawes verskyn elke Vrydag en is op sosiale media en YouTube beskikbaar.

'n Gedig

Die regte weergawe

Mag die bome groen bly
en die sterre wit,
en mag daar altyd mense wees
wat mekaar sonder skaamte
in die oë kan kyk –
...want die lewe is 'n asem lank
en die sterre op die Anderplek donker.

Breyten Breytenbach

<https://ink.org.za/biblioteek/gedigte/breyten-breytenbach/>

Fondsinsamelings en Kerksake

- **Vertel ons asseblief van geleenthede by jul gemeentes.** Stuur asseblief die besonderhede na: taal@nhk.co.za.

<p>25 Julie vanaf 12:00</p>	<p>Gemeentes Vanderbijlpark & Rietspruit se Hoenderkarnaval: Kom geniet 'n hoenderspyskaart van formaat! Voorgereg: hoendersop, hoofgereg: 'n halwe hoender, twee groentes, rys en nagereg: gebakte poeding en vla. Kuier saam by die kerk of kom kry 'n wegneemete. Koste: R150 vir volwassenes en R100 vir kinders onder 12. Ander aktiwiteite sluit in stalletjies, skyfskiet, veerpyltjies, springkasteel, tuisbedryftafel en vele meer. Kontak ds Errol by 083 455 6922 of Sampie by 082 634 5646.</p>
<p>25 Julie vanaf 08:00 tot laat</p>	<p>Hartklop Karnaval: Daar wag hope lekker eetgoed en prettige aktiwiteite – iets vir elke smaak en ouderdom. Kom geniet die dag saam met familie en vriende, waar daar lekkernye te kies en te keur is! Spesiale Hoogtepunt: Neem deel aan ons 5 km ColourRun om 10:00 teen slegs R50 per persoon – pret en kleur vir almal! Kontak ds Lammert van Rooyen by 074 866 8242 vir meer inligting. Moenie dit misloop nie – ons sien jou daar!</p>
<p>1 Augustus van 08:00 tot 13:00</p>	<p>Gemeente Meyerton-Suid hou basaar op die kerkterrein. Stalletjies is beskikbaar teen R100 per stalletjie. Kom kuier saam met ons.</p>
<p>8 Augustus om 07:00</p>	<p>Gemeente Hartebeestpoort bied weer die jaar hulle 5de Bosveld MTB aan. Daar is 'n keuse van vyf afstande, naamlik: 4 km & 8 km <i>kiddies ride</i>, 36 km, 91 km en 156 km. Dit vind by Brits-vliegveld plaas. Aanlyn inskrywings kan gedoen word. Vir navrae kontak: Ds Corlien van der Merwe by 083 654 8154, Marcel by die kerkkantoor 012 252 4315, Mechiel Ras by 072 605 1393, Mias van der Merwe by 083 320 2466. Klik hier vir meer inligting en inskrywings en hier vir inskrywings via Entry Ninja.</p>
<p>21 Augustus vanaf 17:00</p>	<p>Gemeente Pretoria-Oos: Steve onder die sterre. Kom ondersteun hierdie fondsinsamelingsprojek vir die diens en herstel van die orrel. Koste: R200 per volwassene of R500 per gesin. Die aand gaan die vorm van 'n mini-basaar aanneem. Kaartjies is beskikbaar by die kerkkantoor by 012 460 8441. Bring asseblief jul eie kampstoele.</p>
<p>22 Augustus vanaf 14:00</p>	<p>Gemeente Outjo en Otjiwarongo: Kom speel saam met ons naggholf en geniet ons basaar. Die naggholf begin 14:00 met nege putjies, gevolg deur aandete en 'n verdere nege putjies. By die basaar is daar onder andere heerlike pannekoek, biltong en stalletjies. Vir meer inligting, kontak: Sunet Hayward by 081 224 1717, Tony by 081 213 3720 of Elsebie by 081 229 6490.</p>
<p>28 Augustus 19:00</p>	<p>Gemeente Schoemansdal: Magda Louw en haar Erhard kom kuier met hul vertoning How Louw can you go? Kaartjies kos R220 per persoon en is beskikbaar by Lezl by die kantoor by 012 253 0146. Dit is 'n fondsinsamelingsprojek vir die NHSV.</p>
<p>Sluitingsdatum: 30 September</p>	<p>Gemeente Dullstroom: Koop 'n lootjie teen R100 en staan 'n kans om een van drie vakansies te wen. Kaartjies kan by die gemeente gekoop word deur 'n inbetaling in die gemeente se bankrekening te doen. Bankbesonderhede: FNB, rekeningnommer: 62049581516. Gebruik asseblief u naam as verwysing. Bewys van betaling moet aan Hannelie by 082 839 5669 gestuur word om u kaartjienommer te ontvang.</p>

20 Augustus 2026

Silver Lakes Golf & Wildlife Estate
TEN BATE VAN KINDERBESKERMING

- ↳ Skryf 'n 4-bal in vir R5 200 - 2 gholfkaretjies, halfweg- en aandete ingesluit
- ↳ Borg 'n putjie R2 200 - 2 middagetes ingesluit
- ↳ 4-bal plus putjeborg vir slegs R6 800



DRIVE FOR A CHILD

064 437 5997

info@rata.org.za

www.driveforachild.co.za

SP Engelbrecht-museum



SP ENGELBRECHT-
MUSEUM

Lidmate word vriendelik uitgenooi om ons kerkmuseum te kom besoek. Die museum is geleë op die gronde van Gemeente Wonderboompoort te Mansfieldlaan 624, Eloffsdal, Pretoria.

Kontak asseblief vir ds Johann de Bruin,
careljohann@gmail.com of 082 733 3951 om u besoek te bespreek.



Toerusting

- **Pastorale beradingskursus: Sewe beginsels wat 'n huwelik laat werk**
Zoom-aanbieding deur **prof Wentzel Coetzer**. Die kursus is oop vir almal.
Datum: **Dinsdag 1 September 2026**
Tyd: 09.00 tot 13.00
Akkreditering: VBO-, CPSC- en AFM PCD-punte
Koste: R300 pp (R45 ekstra vir inskrywings uit Namibië en die buiteland as gevolg van bykomende bankheffings). Handboek te koop (opsioneel): R390 (R250 plus R140 vir koerier).
Navrae: 083 660 0409 (ook WhatsApp) of e-pos: wentzelc@gmail.com.
Volg die kursus op 'n latere datum: Persone wat nie die betrokke oggend die kursus kan bywoon nie, kan nogtans registreer en dan agterna 'n skakel ontvang om op enige latere datum weer die kursus te kan volg.
Klik **hier** om vir die kursus te bespreek.

WENZEL COETZER

Sewe beginsels wat 'n HUWELIK laat werk

KI-KATS

Demonstrasievideo-KLIK



Die SGB Werkgroep vir Jeugbediening stel bekend:

KI-Kats

'n Nuwe innoverende aanlyn Hoërskool Kategese Sisteem

• 2 Kurrikulums met 410 lesse beskikbaar.

• 'n AI-Tutor sisteem

• 'n AI-verslag sisteem

Leerders kan prente genereer, videos van les-interaksies

genereer, 'n gedig genereer en 'n liedjie genereer.

Leerders klets met die AI-tutor, beantwoord vrae, leer

Bybeltekste, en stel self vrae.

• 'n Globale punteleer vir alle leerders.

• Volledige dinamiese lesplanne vir alle mentors.

Toegang is slegs R100.

Probeer vandag die eerste les gratis.

<https://www.dramekaarselaste.co.za> > Meer > Vir

Kinders > Geloofsonderrig H/S

Inligting: deon7373@gmail.com

Barmhartigheid

- Klik asseblief [hier](#) vir meer inligting oor **seniorbehuising en -versorging**.

Gebed vir die week

Vader,
dankie dat U my gewys het hoe ware liefde daar uitsien.
Maak my asseblief volmaak in u liefde
deur aan my die gedeeltes van my lewe te wys
wat nie in ooreenstemming met u Heilige Gees is nie.
Wys my waar ek selfsugtig is,
my eie belange bevorder en maklik kwaad word,
sodat ek daardie dinge aan U kan oorgee
en U toelaat om daardie eienskappe
deur u onbaatsugtige liefde te vervang.
Herskep my in iemand wat ander liefhet net soos U my liefhet.
In die Naam van Jesus.
Amen.

https://blog.youversion.com/af_ZA/2021/08/nege-gebede-wat-jou-help-om-die-vrug-van-die-gees-te-ontwikkel/ -